

02
ANTONII STÖRCK,
SAC. CÆS. REG. APOST. MAJ. CONSILIARII
AULICI, ARCHIATRI, IN NOSOCOMIO CIVICO PAZ-
MARIANO PHYSICI, SOCIET. BOTAN. FLORENT., ACADEM.
SCIENT. SIEN., ACADEM. PRINCIP. HASS. &c. MEMBRI,
INCLYT. FACULT. MED. DECANI EMERITI, ET HOC
TEMPORE IN ANTIQUISSIMA AC CELEBERRIMA
UNIVERSITATE VIENNENSI RECTORIS,

LIBELLUS,

QUO DEMONSTRATUR:

HERBAM, VETERIBUS DICTAM
FLAMMULAM JOVIS,

POSSE TUTO ET MAGNA CUM UTILITATE
EXHIBERI ÆGROTANTIBUS.




V I E N N Æ,

TYPIS JO. THOM. NOB. DE TRATTNERN,
SAC. CÆS. REG. AUL. TYPOGR. ET BIBLIOP.

P R A E F A T I O.

Altissimus creavit de terra medicamenta, & vir prudens non abhorrebit illa. Eccles. cap. xxxviii.

 *Monet nos Medicos sacra scriptura, ut prudentes simus, & iis absque horrōre utamur, quæ in salutem ægrotantium creavit Deus.*

Nam quæ *Ille* fecit, omnia bona sunt, & in suos usus destinata, & dixit *Deus*: Genes. cap. i. *Ecce! dedi vobis omnem herbam afferentem semen super terram & universa ligna, quæ habent in semetipsis semen generis sui, ut sint vobis in escam.*

Nulla igitur herba creata est, ut humano generi perniciem adferret; & soli nostræ ignorantiae vel casui fortuito videtur attribuendum, dum ex ea assumpta,

quid mali evenit. Etenim, si debito tempore, recta methodo, & iusta dosi exhibeatur, nunquam poterit nocere.

Sunt multi, qui in abstractissimis processibus chemicis quærunt ex metallis medicamenta, & negligunt ea, quæ tellus largiter offert, quæ natura provida sponte paravit, & quæ corpori nostro sunt longe magis analogæ.

Quam felices forent ægri ! qui nunc fatis suis & calamitatibus miserrimis sine omni auxilio relinquuntur, si studium medicum majori cum fervore ad indagandas plantarum virtutes impenderetur.

Nimium sumus timiduli in exhibendis remediis efficacioribus.

Cur non liceret maniacorum & epilepticorum corpora fortius aggredi, & turbare naturam male operantem ?

Cur podagricis nulla esset medella ?

Cur nullum inveniretur remedium, quod calculum solveret ?

Cur

Cur in regno vegetabili nullum daretur antidotum luis venereæ? variolarum? vel miasmatis cujuscunque contagiosi?

Cur nulla spes esset curandi phthificos, aliosque ægros, quos plerumque inter incurabiles reponimus?

An non is de patria & toto genere humano plurimum mereretur, qui contra hos morbos maxime rebelles novum detegit medicamentum?

In hoc opusculo recensentur experimenta, quæ ego cum herba, dicta veteribus *Flammula jovis*, institui.

Æstate præterita, dum subinde aliquot horulas a labore liberas habuisssem, plantas minus usitatas conquisivi; me tunc comitabatur *Joannes Jacobus Well*, ad ursum nigrum pharmacopæus viennensis, quem ob singularem, tam in chemicis, quam botanicis, scientiam multum veneror.

Invenimus *Flammulam jovis*, herbam pulcherrimam, & copiose crescentem, quæ ob acrimoniam suam & vim urentem ad

usus medicos non adhibebatur, & horrebant eam omnes.

Verum tamen huic plantæ magnam virtutem & utilitatem inesse arbitror; & constabit ex sequentibus: eam tuto & maximo cum emolumento posse exhiberi ægris, quos alia remedia non juvant.

Nesocomium *S. Marci*, in quo ægri detinentur, qui morbis, curatu difficillimis laborant, mihi pro his experimentis amplissimum campum præbuit.

Doctissimus ac expertissimus Dominus *Xaverius Fauken*, Physicus in eodem nosocomio, & dexterrimus ibidem chirurgus Dominus *Antonius Rechberger* ad bonum ex hac planta successum solita diligentia & peritia multum contulerunt; & gaudebant mecum semper, dum effectus adeo bonos, quos antea sperare non licuit, viderunt.

Junxi simul quædam experimenta de *Dictamno albo*.



C A P U T I.

D E

FLAMMULA JOVIS.

Flammula jovis offic. veterum.

Clematis erecta Linn. syst. nat. t. 2. pag. 377. edit. 12.

Clematis Recta Jacquin enum. stirp. vindob. pag. 95.

Flammula recta Bauh. pin. 300.

Flammula Clusii pag. 124.

Germanis dicitur aufrechte brennende Walldrebe. Anglis
Upright ladies Bower. Gallis Flammule. Bat.
Recht obstaande flammula, wit Vier-Kruid.

PLANTÆ DESCRIPTIO.



radice multiplici, ramosa, per-
 enni *caulis* exfurgit firmus, re-
 ctus, sæpe rubescens, trium
 quatuorve pedum altus, ima

parte nonnunquam ramosus, ramis op-

positis, divergentibus. *Folia* & ramos (dum adfunt) & reliquum caulem ornant majuscula, opposita, pinnata, quorum rachis utrinque vestitur *foliolis* plus minus duobus cum impari, ovato-lanceolatis, integerrimis, petiolatis, facie saturate vibrantibus, dorso parumper pallidioribus, sapore acri, urente donatis. *Flores* ad caulis fastigium emergunt plurimi, odorati, pedunculis inferioribus simplicibus, axillaribus, oppositis, summis plerumque trifidis, elongatis suffulti, *calyce* destituti, gaudentes *corolla* frequentissime tetrapetala, raro pentapetala, e *petalis* albidis, oblongis, laxis. *Stamina* prodeunt plurima, *filamentis* erectis, subulatis, *corolla* brevioribus, *antheris* filamentorum lateri ad apicem adnatis. *Germine* medietullum floris occupant numerosa, deficientia in *stylos* subulatos, staminibus vix non longiores, abeuntia dein in *semina* plura, subrotunda, parum compressa, plumula terminata. *Joan. Jac. Well.*

Cre-

Crescit hæc planta in sylvaticis Austriæ inferioris copiosissime, præsertim inter dumeta.

Folia recentia gustata magnum ardorem excitant in lingua & faucibus, diutius supra linguam relictæ rabefaciunt, vesiculas trahunt, partes exulcerant.

Folia sicca saporem habent ex acidofubdulcem, leniter adstringentem, parum urentem.

Flores masticati ardorem in lingua & partibus vicinis diu persistentem producant

Ex foliis siccis paratur infusum.

℞. fol. flamm. jovis dr. j.

consciss. infund. f. q. aq. ferv. vase

clauso per $\frac{1}{4}$ horæ

sub finem per momentum ebull.

dein colat. lib. j.

exhibe.

Sensim potest hoc infusum fortius reddi, fumendo foliorum

dr. iij vel unc. β.

Flores infunduntur sequenti methodo :

℞. flor. flammul. jovis. dr. j.

infund. f. q. aq. ferv. per $\frac{1}{8}$ hor.

dein colat. lib. j. exhibe.

Si e floribus addatur dupla vel tripla copia, fit infusum saturatnm, quod leviter urit linguam & fauces, nec tamen ingratum est; præsertim si saccharo vel fyrupo quodam edulcoretur.

Ex his infusis sumitur bis, ter, vel quater per diem vasculum unum, unciarum quatuor.

Ex herba recenti paratur extractum, cujus per diem granum unum, duo vel tria &c. possunt exhiberi.

Inde conficitur pulvis.

℞. sacch. alb. dr. j

extract. flammul. jovis gr. iij.

m. f. pulvis diu terendo in mortario marmoreo, qui dividatur in sex doses æquales.

f. sumat æger ter de die unum pulverem.

Dum

Dum folia in pulverem contenduntur, caveri debet, ne nares nimium inde afficiantur, nam is in naribus, faucibus & pectore ardorem excitat.

Datur tamen idein pulvis tuto interne; teritur cum dupla sacchari quantitate.

℞. pulv. fol. *flammul. jov.* gr. iij.

sacch. alb. gr. vj.

m. & tere aliquamdiu invicem in mortario marmoreo.

Sumunt ægri bis vel ter spatio 24 horarum similem pulverem.

Auxi sensim dosim pulveris fol. *flammulæ jovis*, donec ægri ter quotidie sumfissent grana decem, nec ullum ab eo incommodum perceperunt.

Canis parvo ingessi unica dosi drachmam integram hujus pulveris, quo facto canis ultra horam dormivit, dein alvum dimisit liquidam cum urina copiosissima; postea alacris fuit, sanus, & oblata devoravit.

Avis tenerrima excrescentiam fungosam exulceratam habuit in vertice capitis, quæ fabæ mediocri magnitudine erat æqualis, insperfi huic pulverem de *flammula jovis*, & intra unum & dimidium diem consumpta fuit tota excrescentia; nec avicula inde pati videbatur, non cecinit; comedit.

Porcus annuus ab octiduo ægrotavit, oblata respuit, continuo agitavit caput, illudque contra muros allisit, & diu noctuque clamavit.

Bubulcus jam in eo varia tentavit remedia, & dixit, quod plures hoc morbo laborantes porcos viderit, qui omnes interierunt, ajebat: huic porco liquefcere & diffluere cerebrum.

Vi tunc folia *flammulæ jovis* recentia tredecim curavi ingeri huic porco tempore vespertino, & totidem altero mane; nil autem mutatum fuit.

Dedi dein ter de die folia recentia viginti, & fpatio trium Dierum porcus integre convaluit.

Cœpit in principio fieri tranquillior,
dein potum amavit;

Tandem oblata avide abligurivit.

Vidi hunc porcum post aliquot septi-
manas sanum, & pinguem.

C A S U S I.

Fœmina, 57 annorum; ulcus vene-
reum, cariosum in palato habuit, & præ-
terea pertinaci ac gravissimo capitis dolo-
re laboravit.

Sumto spiritu frumenti cum mercurio
sublimato pars ossis cariosa separata fuit,
& ulcus coaluit; verum dolor capitis man-
sit æque vehemens, nec ulli remedio,
etiam fortissimo & diu continuato, cessit.

Die 16 Jul. 1768 cœpit uti infuso
herbæ *flammulæ jovis*, & ter de die sum-
sit vasculum unciarum quatuor.

Per triduum nulla mutatio contigit, nisi
quod urinæ fluxus paulo copiosior obser-
varetur.

Die

Die 19 Julii dolor capitis fuit valde exiguus, noctu autem iterum rediit æque molestus.

Die 21 Jul. dolor omnis cessavit, somnus tota nocte fuit tranquillus, & reficiens, qui antea nec larga opii dosi conciliari potuit; percipiebatur autem tunc sudor multus in toto corpore; ægra erat plena gaudio, quoniam se sensit a tanto malo liberam, quo jam a tot mensium spatio misere diu noctuque torquebatur.

C A S U S II.

Fœminæ, 30 annorum, idem infusum in pertinacissima cephalæa profuit. Ex usu hujus remedii noctu ægra copiose sudavit, unde levamen habuit.

C A S U S III.

Vir, 34 annorum, cancro pessimo, exulcerato, fungoso laboravit in labio oris superiore; moles cancri erat ingens, & fœdissima aspectu.

Jam

Jam ultra anni spatium varia & optima remedia fuerunt tentata, quæ quidem subinde levamen adtulerunt, sed moles canceri nunquam diminuta fuit, imo malum sensim extendebatur; nec ulla curationis spes supererat.

Et ideo experiri voluimus, quid *flammula jovis* præstaret; datum est interne hujus plantæ infusum, & externe bis quotidie conspergebatur cancer totus pulvere ejusdem plantæ.

Primis diebus multus inde dolor oriebatur, & copiosus ichor effluxit; dein vero sensim moles tota canceri consumpta fuit, & inducebatur solo hujus remedio interno & externo usu cicatrix firma & æqualis.

C A S U S IV.

Vir, 30 aliquot annorum, ex malo venereo neglecto in tota facie, in omnibus artubus & integro corpore pessimis ulceribus ichorosis, serpentibus, foetidi-

diffimis afficiebatur, labium oris inferius erat turgidum, profunde exulceratum, cancrum, oculi erant inflammati, protuberantes, opaci, palpebræ profunde erosæ, acerrimum serum stillantes, præterea putrida, tenuis, & acerrima saliva continuo ex ore profluxit; nemo hunc miserum sine horrore aspicere potuit.

Per binos fere annos ipsi in nosocomio omnis generis remedia interna & externa fuerunt applicata, & cum a nullo bonus & constans effectus observaretur, miser adnumerabatur iis, qui curari non possent.

Verum tamen cum jam in aliquibus egregiam herbæ *flammulæ jovis* efficaciam vidissemus, eam quoque in hoc miserissimo ægro tentandam credidimus.

Die 16 Jul. 1768 cæpit uti infuso hujus herbæ, ad cancrum labii, & ad reliqua corporis ulcera, ubi caro erat luxurians, & labia collofa pulvis bis quotidie adspergebatur; reliqua ulcera, non profunda, sed foetido ichore manantia,
ali-

aliquoties per diem infuso eodem abluebantur.

Die 20 Jul. urina copiosius fluit, & saliva, ex ore stillans, nec amplius adeo acris, nec foetida, nec adeo tenuis videtur, sed jam fila format, ulcera sunt melioris indolis, & vires paululum insurgunt.

Die 24 Jul. cancer in labio oris non amplius serpit, caro luxurians in omnibus ulceribus consumitur absque dolore, ulcera sunt magis pura, vires meliores.

Die 28 Jul. salivatio penitus cessavit, urinæ fluxus sat copiosus continuat, callosa cancri labia liquefcunt; quædam ulcera formant cicatrices, vires augentur, æger sedet libere in lecto, se se erigit sine adminiculo, & bono cum appetitu oblatos cibos comedit.

Die 1 August. vires jam sunt tantæ, ut e lecto possit surgere, & alterius adminiculo lente ambulare, multa ulcera cicatrice obducta sunt, caro luxurians

B

fere

fere ubique integre confumitur ; labia callosa canceri penitus evanuerunt , & jam in circumferentia videntur cicatricis primordia , palpebræ oculorum incipiunt fanari , ipsa rubedo oculorum multum diminuta est , & oritur manifesta pelluciditas.

In principio mensis septembris usu continuato ejusdem remedii cancer labii oris erat integre curatus , & fere omnia ulcera in toto corpore perfecte coaluerunt , ophthalmia penitus cessavit , & observabatur in oculorum tunicis pelluciditas naturalis , vires , & appetitus constabant , noctes erant tranquillæ , reficientes.

Die 24 Septembr. erumpunt pustulæ scabiosæ in toto corpore , & in inguine sinistro apparet bubo magnus , durus ; ad hunc illico remedia emollientia , & suppuratoria applicantur , interne autem præter infusum *flammulæ jovis* nil datum fuit.

Verum bubo nullo modo potuit ad suppurationem redigi , & sensim iterum disparuit , & ipsæ quoque scabiosæ pustulæ

stu-

stulæ exsiccatæ sunt, datum tunc fuit omni tertio die (præter infusum *flammulæ jovis*) purgans satis forte, & æger bene habuit.

C A S U S V.

Vir, 40 annorum, ex gonorrhæa venerea male curata incidit in luem veneream, & orta sunt in toto corpore ulcera foedissima, sat profunda, foetentia, acrem ichorem plorantia, quorum plurima habebant labia dura, erosa, & in multis caro fungosa excrevit; corpus contabuit; noctes erant inquietæ.

Ultra sesqui anni spatium remedia ei interne & externe applicabantur maxime egregia, quæ quidem malum subinde videbantur levare, verum mox iterum recruduit, & potius auctum fuerat.

Datum tunc fuit ter de die vasculum infusi *flammulæ jovis*, ulcera conspersa sunt ejusdem herbæ pulvere bis per diem.

Effectus fuit bonus & velox, nam intra breve tempus ulcera facta sunt pura,

nitida, caro fungosa confumebatur, vires redierunt, invaluit appetitus; noctes somno tranquillo peragebantur; & spatio binorum mensium homo erat adeo perfecte curatus, ut servitio satis laborioso sibi panem iterum promereri potuerit; continuavit tamen hujus infusi usum adhuc per plures septimanas, ne mali ullum fermentum superesset.

C A S U S VI.

Fœmina, 20 aliquot annorum, ulcus magnum, annosum, putridum, carne fungosa inæqualiter repletum habuit in crure sinistro.

Cum autem protractus optimorum internorum externorumque remediorum usus nil fere juvaret, tentata fuit *flammula jovis*.

Conspergebatur ulcus totum pulvere, & datum interne fuit ejusdem herbæ infusum.

Primis diebus pulvis inspersus ardorem fat magnum excitavit, & venulæ carnis luxuriantis hinc inde sanguinem fundebant.

Postea vero pulvis nullum amplius dolorem produxit, fanies in pus bonum mutata fuit, caro fungosa sensim disparuit, & ulcus factum est planum, purum, instar recentissimi vulneris, pulcherrime rubicundum.

Idem remedium interne & externe continuabatur, & tandem pulchra cicatrix inducta est.

Mirum! quod pulvis recenti & adeo puro ulceri inspersus nec dolorem amplius excitaverit, nec carnem sanam exederit!

C A S U S VII.

Fœmina, 30 annorum, jam ultra annum tophos venereos in utraque tibia habuit, ossa circa articulum cubiti dextri intumulerunt in magnam molem; manus non poterat moveri, nec flecti brachium; aderant ulcera mali moris in facie, brachiis, & toto corpore; præterea omnes

artus vehementissimo dolore, præsertim nocturno, excruciabantur.

Sub usu pertinaci remediorum variorum, & laudatissimorum in hoc morbo, vires collabebantur, accessit macies, nec malum emendatum fuit.

Infusum *flammulæ jovis* primo tempore sudorem copiosum noctu elicuit, ægra autem inde per binas septimanas nullum levamen percepit; dein vero dolores paululum imminuti sunt, tandem cessarunt penitus, evanuerunt tophi, consolidata sunt ulcera, redierunt vires; sed immobilitas cubiti dextri & tumor ibi perstiterunt, & ideo tunc præter infusum *flammulæ jovis* datum est sulphur auratum antimonii, unde sensim brachio mobilitas rediit.

C A S U S VIII.

Vir, 50 aliquot annorum, in crure dextro laborat ulcere putrido, sordidissimo, serpente, inveterato, magno admo-

modum, & repleto carne fungosa, inæquali.

Insperfus fuit bis quotidie pulvis her-
bæ *flammulæ jovis*.

Primis diebus dolorem, ardoremque magnum inde sensit æger, qui autem nunquam ultra horæ quadrantem duravit; deincepsit caro fungosa confumi, & spatio unius & dimidiæ septimanæ ulcus purum fuit, planum, & optimi coloris; pulvis tunc insperfus nullum amplius doloris sensum excitavit, & tandem solo hoc remedio externo cicatrix formata fuit plana, firma.

C A S U S IX.

Viro, 40 annorum, ex malo venereo oritur cancer pessimi moris, exulceratus, fungosus in labio oris superioris, nasus obsidetur tuberculis magnis, callosis, dolentibus, quæ sensim quoque sunt exulcerata, & ichor foetidus & acer exstillavit.

Remedia in lue venerea & similibus malis alias maxime efficacia, huic ægro nullum levamen adtulerunt, & cancer potius extendebatur.

Quare pulvis *flammulæ jovis* cancrofis ulceribus inspersus fuit, & datum interne infusum ejusdem herbæ.

In principio æger post quamlibet insperfectionem pulveris dolorem ardentem conquerebatur, qui vero post pauca minuta iterum cessavit.

Spatio binarum septimanarum cancri ulcus in labio purum fuit, nec ulterius serpsit, aberat omnis dolor, labia callosa fundebantur, & post unum & dimidium mensem cancer perfecte curatus est.

Tubercula autem, quæ nasum occupabant, erant magis pertinacia, & quamvis ibi ulcuscula cicatrice obducerentur, erat ea levis tantum, & mox iterum rupta acre serum ploravit; erat præterea horum tuberculorum durities fere cartilaginea,

ginea , unde ad hæc curanda longiore tempore opus fuit.

C A S U S X.

Homo , 20 aliquot annorum , ulcus gangrænosum , foetidissimum , & magnum habet versus malleolum externum in crure sinistro , percipitur simul ossis tibiæ plaga , satis magna , profunde cariosa.

Data sunt , quæcunque in gangrænosis ulceribus laudantur , & quæ alias optimos effectus præstarent ; externe applicabantur fortissima antiseptica ; gangrænae ponebantur quidem limites , ita ut ultra serpere non potuerit ; verum nulla facta est separatio , permanfit foetor , & ulceris fordities , & propullulavit caro luxurians.

Ideo pulvis *flammulae jovis* bis quotidie huic ulceri applicatus fuit ; qui primis diebus leves haimorrhagias , & dolores ardentis , sed momentaneos produxit ; mox autem ulcus purius redditum est ,

ichor minus fœtebat, portio ossis cariosi cœpit vacillare, & caro luxurians consumi.

Ufu continuato hujus remedii pus bonum fiebat; labia ulceris, alias turgida, inæqualia & fœdissimi coloris, detumuerunt, & cutis naturalis formam recuperarunt; demum secessit magna portio ossis cariosi, sensim formata est cicatrix, & ulcus coaluit.

C A S U S XI.

Fœmina, 27 annorum, excrescentiam cancrofam, exulceratam, & admodum extensam habet in femore sinistro.

Applicatur pulvis *flammulæ jovis* externe, & interne datur infusum ejusdem herbæ.

Ex usu pulveris magnum ardorem in principio conquerebatur ægra; infusum autem urinam copiose eduxit.

Intra aliquot septimanas plus quam dimidia hujus carcinomatis pars consumpta fuit,

fuit, & aderat p[ro]p[ter] bonum; noluit autem ægra diutius in nosocomio morari, &, non curata, abiit.

C A S U S XII.

Homo, 36 annorum, in dorso manus dextræ habet excrescentiam fungosam, rotundam, tres pollices latam, & ultra unum pollicem altam, quæ tota foedissime erat exulcerata.

Insperfus pulvis herbæ *flammulæ jovis* in principio adtraxit copiosissimum & putridum ichorem, ortus est foetor enormis; sensim dein totam excrescentiam consumsit citra dolorem, & factum est ulcus purum, planissimum, quod usu ejusdem remedii cicatrice obductum fuit.

C A S U S XIII.

Juvenis, 17 annorum, scabie annosa, humida laboravit, & cutis in toto fere corpore erat fissa & erosa, dabatur ipsi infusum herbæ *flammulæ jovis*, & corpus
bis

bis quotidie eodem infuso abluebatur, quo factum est, ut intra sex septimanarum spatium scabies evanuerit, & erosiones cutis integre fuerit consolidatæ; licet alia remedia antehac diu & copiose adhibita, nil effecerint.

C A S U S XIV.

Virgo, 25 annorum, a pluribus annis ulcera copiosa, serpentina in collo, facie, & tota capitis parte capillata habuit, hæc autem non erant profunda, verum acerrimum & copiosissimum ichorem continuo stillabant, & magnum ardorem excitarunt.

Hæc eluebantur bis quotidie infuso herbæ *flammulæ jovis*, quod & interne datum fuit, quo sanitas integra sensim restituebatur.

C A S U S XV.

Vir, 63 annorum, ex gonorrhæa venerea male curata doloribus artuum jam a
duo-

duodecim annis vexatur; sumfit infusum herbæ *flammulæ jovis*, quo dolores artuum remiserunt, sed intumuit testiculus dexter, & valde doluit; applicatis autem cataplasmatibus emollientissimis, datisque purgantibus hicce tumor iterum disparuit, prodiit per urinam materies puriformis, & arthritis filuit.

C A S U S XVI.

Vir, 68 annorum, simili, ac in priori casu, malo laborans idem remedium sumfit, sed nullum inde levamen percepit, licet ejus usu urina copiosissime mota fuerit.

C A S U S XVII.

Virgo, 32 annorum, jam a septem annis dolore capitis vehementissimo & fere continuo affligebatur, & debebat sæpe per plures dies lecto inhærere.

Sumto infuso florum *flammulæ jovis* mox magnum sensit levamen; tandem
dolor

dolor omnis cessavit; & jam per plures septimanas caput liberum est.

C A S U S XVIII..

Fœmina, 46 annorum, ulcus annosum, foetidissimum, putridum, carne fungosa repletum habet in crure dextro.

Applicatur pulvis herbæ *flamulæ jovis*, quo primo die tantus dolor excitatur, ut ægra fere in animi deliquium inciderit; hicce autem dolor fuit tantum momentaneus.

Altero die a pulvere magnus ardor percipiebatur, & ulcus coepit copiosissimum serum fundere.

Reliquis diebus vix ullam amplius molestiam pulvis adtulit, fluxit ex ulcere copiosus humor, qui in principio multum foetebat, & erat acris, dein vero caro fungosa sensim imminuta fuit, & ulcus reddebatur purum, labia callosa facta sunt mollia, & tandem cicatrix est inducta.

C A S U S XIX.

Virgo, 32 annorum, excrescentiam carneam, excoriatam gerit in colli parte anteriore.

Inspergitur pulvis herbæ *flammulæ jovis*, unde levis ardor oritur, & fluit copiosus ichor primis quatuor diebus; dein vero nullus inde amplius effectus sequebatur, & malum nec emendatum, nec pejus redditum fuit, licet per aliquot septimanas hoc remedium applicatum fuerit.

C A S U S XX.

Juvenis, 20 annorum, glandem penis habet tumidam, totam exulceratam, & foedam excrescentiis fungosis, semiputridis.

Pulvis herbæ *flammulæ jovis* inspersus in principio magnum ardorem & leves haimorrhagias excitavit; dein vero intra aliquot septimanas malum integre curatum fuit solo hoc remedio.

C A S U S XXI.

In ulceribus urethræ datum infusum herbæ *flammulæ jovis*, & leni vi per syringam injectum aliquoties profuit.

C A S U S XXII.

Puer, 7 annorum, a tribus annis habet tumorem magnum, durum, qui totam articulationem superiorem ossis femoris dextri occupavit; reddidit femur immobile, & præ dolore continuo puer dormire non potuit, & incepit contabescere.

Aderat præterea in inferiore parte hujus tumoris ulcus finuosum, ex quo ichor acer semper destillavit.

Sumit infusum herbæ *flammulæ jovis*, & minuitur dolor, decrescit tumor, advertitur femoris quædam mobilitas, & ichoris loco, prodit pus bonum.

C A S U S XXIII.

In cancro pessimo, exulcerato labii inferioris, applicatur pulvis de *flammula jovis*, & malum quotidie minuitur, cessat salivatio, quæ hunc ægrum debilitavit, & nullum dubium est, fore: ut brevi tempore integra curatio perficiatur.

C A S U S XXIV.

Dominus *Reckberger*, chirurgus nosocomii ad *S. Marcum*, in fungoso, & exulcerato mammæ cancro adhibuit pulverem de *flammula jovis* bono cum successu; nam consumebatur sine dolore caro fungosa, & facta est cicatrix.

C o r d l l a r i a.

¹^{mum} Herba dicta Veteribus *flammula jovis* tuto potest exhiberi ægrotantibus.

²^{dum} Pulvis hujus herbæ externo usu magnam utilitatem habebit in morbis chirurgicis; etenim excrescentias fungo-

C

sas,

fas, & subcarneas consumit, & ulcera fordida reddit pura, eaque sensim curat.

3^{tium} Licet pulvis herbæ *flammulæ jovis* carnes fungosas consumat, non tamen rodit carnes vivas ac sanas, sed has tegit cuticula; quod mirum videtur.

4^{tum} Hinc pulvis de *flammula jovis* est omnibus remediis causticis hucusque usitatis & cognitis præferendus, ubi caro fungosa adest.

5^{tum} Pulvis de *flammula jovis* solus sæpe curat cancrum exulceratum.

6^{tum} Sæpe curat ulcera maligna.

7^{tum} Non tamen hicce pulvis est remedium universale in omnibus ulceribus & cancris.

8^{tum} Infusum *flammulæ jovis* interne datum in diuturnis capitis doloribus est quandoque admodum proficuum.

9^{tum} Hoc idem infusum curat subinde pertinacissimos ossium dolores, quandoque tollit reliquias a lue venerea, quæ nulli alii remedio cedunt.

10^{mum} Prodest quandoque in scabie pertinacissima, & in ulceribus ichorosis.

11^{mum} Corrigit varias corporis acrimonias; & in aliquibus ægris promovet urinam, in aliis sudorem; paucis movet alvum.

12^{mum} Idem effectus habetur, si vel pulvis hujus plantæ, vel extractum interne exhibeatur.

13^{tium} Ex tot factis experimentis nil mali unquam observatum fuit, nec ulla corporis actio turbabatur ex usu *flammulæ jovis*.

14^{tum} Pulvis ulceribus inspersus subinde primis diebus magnum ardorem excitat, unde consultum erit: si prima vice pauca tantum quantitas hujus pulveris applicetur; ut observari possit: an æger inde afficiatur.





CAPUT II.

DE

DICTAMNO ALBO.

Dictamnus albus offic.

Dictamnus albus Linn. sp. pl. t. 1. p. 548. edit. 2.

Dictamnus albus Jacquin. Enum. stirp. vindob. p. 68.

Dictamnus albus vulgo, seu *Fraxinella*. Bauch. pin.

222.

Fraxinella, seu *Diptamnium* album off. Dodon. pempt.

348.

Germanis dicitur weißer Diptam. Gall. Dictam Blanc.

Fraxinelle. Angl. Bastard Dittany. Bat. Effen · kruid.

PLANTÆ DESCRIPTIO.

Radix crassa, digiti transversæ crassitie, varie divaricata, perennis, externe gilva, interne alba, odore hircino, sapore ex aromatico amaricante prædita, *Caules* emittit cubitales, aut sesquicubitales, firmos, subteretes; imitus folio-

lios, læves, virides, summotenus subnudos, punctatos, scabriores, rubentes. *Folia* circum caulem alternatim emergunt pinnata, composita ex *foliolis* utrinque tribus, aut quatuor cum impari, sublan-
ceolatis, brevissime petiolatis, leviter ferratis, firmis, nitidis, pellucido-punctatis, viridissimis. *Flores* aspectu elegantissimi, grave olentes ad caulis fastigium laxè supra invicem digesti *pedunculis* sustentantur alternis, rubentibus, stipulatis. *Calyx* ex *foliolis* quinque parvis, subfuscis, asperis conferitur; *Corollam* vero *petala* componunt quinque, calyce longe majora, patula, inæqualiter sita, ovato-lanceolata, acuminata, unguiculata, pallide rubentia, venulis saturate rubris, liratis dispositis picta. *Stamina* numero decem *filamentis* elongantur subulatis, rubellis, punctatis, declinatis, inæqualibus: *Antheris* flavidis, assurgentibus, tetragonis. *Germen* quinquangulare, receptaculo elevatum *stylum* gerit simplicem, brevem, declinatum,

incurvatum, *stigmatē* acuto terminatum. *Pericarpium* succedens ex *capsulis* constat quinque bivalvibus, scabris, margine introrsum coalitis, compressis, acuminatis, *semina* nigra, splendida, ovata, bina intra arillum communem, bivalvem recondita, continentibus J. J. *well.*

Crescit copiose in monte Cetio, nec non in vicinis sylvis montosis, & collibus passim.

Vires hujus herbæ videntur plurimum inesse radici, quæ in pulvere exhibetur; vel paratur inde essentia.

℞. rad. Dictam. albi recentis & minutim scissæ unc. jj.

Spirit. vini purissimi unc xiv.

m. & stent in digestionē, donec fiat essentia bene saturata; tempore digestionis agitetur subinde lagenula.

Vinum medicatum ex radice *Dictamni albi* sæpe prodest in chlorosi & retentione menstruorum.

℞. pulv.

R. pulv. rad. Dictam. alb. unc. j.
Limat. mart. n. rubig. dr. iij.
vin. generos. aust. lib. j.
m. & digere per 24 horas, dein
colat. exhibe.
Datur omni bihorio cochleare unum.

C A S U S I.

Puer, 10 annorum, per aliquot annos omni tertio quartove die vexatur paroxysmo epileptico, vehementi valde.

Causa mali erat ignota.

Dedi in principio purgans ex radicis jalapæ & salis polychresti aâ granis xx., quo alvus sæpius mota fuit.

Dein exhibui mane guttas viginti de essentia radicis *Dictamni albi*, & totidem circa meridiem, & vespere.

Primus paroxysmus , qui post usum hujus remedii tertio die ortus est , fuit longe vehementior , quam præcedentes esse solebant ; puer fuit tota die sensuum expers , & mater ei moriendum putabat.

Venit altero a paroxysmo die mater ad me , & acerbe lachrymando tristem filii sui casum mihi enarravit ; blandis verbis tunc eam consolari adnissus sum , & suasi , ut ter de die præberet triginta guttas ejusdem tincturæ.

Post aliquot dies mater iterum retulit , paroxysmum quidem die quarto rediisse , sed fuisse multo mitiorem : jussi , ut jam eadem dosi continuaret remedii usum.

Factum dein fuit , ut intervalla paroxysmorum fuerint longiora , & vis mali semper debilior.

Sumsit puer idem remedium , eadem dosi , spatio binorum & dimidii mensium ; & tunc erat sanus.

In corpore suo nullam a remedio mutationem sensit, nisi: quod urina sub usu hujus tincturæ copiosissime fluxerit.

C A S U S II.

Puella, 15 annorum, ultra biennium vehementi epilepsia laborat, & inde quotidie afficitur.

Sumit ter de die guttas triginta de essentia ex radice *Dictamni albi*, videtur inde malum minui, & ægra subinde per tres, subinde per quatuor dies libera est a paroxysmo.

Augebatur tunc remedii dosis; & datæ sunt guttæ quinquaginta quotidie ter; vires inde paulisper erigebantur, & spes magna erat perfectæ curationis; verum subito omnia iterum in pejus mutata sunt, rediit quotidie paroxysmus, æque vehemens ac in principio.

C A S U S III.

Fœmina, 36 annorum, incidit in pessimam melancholiam, desperabat de æterna salute, & se omni momento a fœdissimis & horrendis spectris ac centenis diabolis rapiendam credebat; noctes erant insomnes, & appetitus deletus; accessit præterea corporis macies, & menstruorum irregularitas.

Tristi hoc in statu per septem menses versabatur; tandem exhibui ipsi ter quotidie guttas quinquaginta tincturæ radicis *Dictamni albi*, copiosa inde urina pellebatur, & post aliquot dies sensit ægra magnum levamen, & per plures horas fuit alacris, & sine omni mentis angustia jucunde colloquebatur cum amicis & prolibus.

Anxietates & mentis perturbationes solummodo per vices redierunt; invaluit appetitus, & noctes fiebant magis tranquillæ.

Da-

Dabantur dein ter quotidie guttæ sexaginta ejusdem tincturæ , & tunc prorupit copiosissimus sanguinis fluxus ex utero , cui maximum morbi levamen supervenit.

Continuatum fuit idem remedium eadem dosi , & nono die sistebatur uteri fluxus , & prodiit iterum urina copiosior ; morbus fuit admodum mitis , & vix subinde quædam reliquiæ observabantur.

Post decem dies denuo incepit sanguis ex utero copiose stillare , & paulisper inde ægra fuit debilitata ; nihilominus in usu ejusdem remedii pergebatur.

Post aliquot dies cessavit sanguinis fluxus , & ægra mentis erat penitus compos , recuperavit vires , bene dormivit , appetiit.

Volui tamen adhuc remedium continuare per aliquot septimanas , ne tam facile malum rediret , verum movebatur inde nimium sanguis pro uteri vasa excretoria , & timebam uteri haimorrhagiam , unde abstinendum credidi.

In-

Interim tamen morbus filuit perfecte, & jam ultra octo menses hæc foemina optime valet.

C A S U S IV.

Puer, 10 annorum, feбри tertiana laborat, datur ipsi purgans ex sale polychresto & syrupo manato; febris inde mitior facta non est.

Sumfit dein quotidie ter grana quinque pulveris radice *Dictamni albi*, cujus usu intra duodecim dies a feбри liberatus fuit.

Ventrem quoque a longo tempore tensum & magnum habuit, qui eodem remedio (explosis innumeris flatibus maxime sonoris & foetidissimis) in statum naturalem redactus fuit.

Disparuit etiam cachexia, qua puer hicce a multo tempore laboravit.

C A S U S V.

Binis adhuc infantibus idem pulvis in febre intermittente profuit.

C A S U S VI.

Puella sex annorum ventrem durum, magnumque gessit ultra annum, & jam aliquoties alvo excrevit vermes longos, rotundos, & corpus emarciabatur.

Exhibebantur eiter quotidie grana novem pulveris radicis *Dictamni albi*, unde mox incepit habere meliorem appetitum, plures prodierunt vermes, & solo hoc pulvere sensim rediit sanitas.

C A S U S VII.

In puero octenni, vermibus laborante, idem remedium tentavi; sed nil profuit, & alvus inde potius retinebatur, quæ tamen in priori casu ex hoc pulvere sæpius mota fuit.

Unde composui pulverem sequentem
℞. Rad. *Dictamni albi* gr. vjj.

rad. jalap. gr. iij.

m. f. pulv.

S. detur per diem ter talis dosis.

Ex

Ex usu hujus pulveris cœpit prodire per alvum multum gluten tenax, cui involuti erant copiosi parvi vermes, dein excreti sunt bini lumbrici magni.

Cum autem alvus inde nimium solvebatur, datus solummodo unus pulvis fuit quotidie.

Quo intra mensis spatium puer bene curabatur.

Eundem pulverem dein pluribus bono cum successu exhibui, qui vermes in ventre gerebant.

C A S U S VIII.

Fœmina, 35 annorum, menstruo fluxu a binis annis carebat, causam rejecit in terrorem, quo affecta fuit tempore mensium, unde ii illico retinebantur.

Adhibuit balnea, & varia remedia emenagoga citra ullum levamen; sensit tensionem continuam in toto hypogastrio, & tactu percipiebatur magnus infarctus in ipso utero & in partibus vicinis.

Ex.

Exhibui tunc mane grana viginti pulveris radicis *Dictamni albi*, & totidem vesperi.

Primis diebus copiosa prodiit urina, & ægra fenfit magnum pruritum circa vasa haimorrhoidalia.

Tandem ex utero cœpit prodire mucus viscidus, copiosus, qui in principio subfuscus erat, dein fiebat albus, demum cum hoc muco prodibant striæ sanguineæ; minuebatur tensio, & evanuit omnis infarctus; ægra, antehac tristis & morosa, fiebat hilaris, & alacris.

Pulvere hoc utebatur per sex septimanas, & bene habuit. Sub finem dabatur purgans, atque tunc apparuit fluxus menstruus.

C A S U S IX.

Fœmina, 27 annorum fluore albo, jam multum inveterato, laboravit, & conquerebatur de magna & dolenti tensione
in

in toto hypogastrio, menstrua habuit pauca & admodum irregularia.

Sumfit mane grana viginti pulveris radicis *Dictamni albi*, & totidem vesperi.

Mox fluor albus augebatur, & copiosum urinæ stillicidium ortum est cum molesto tenesmo.

Post aliquot dies cessavit tenesmus, mansit autem copiosus fluor albus, & materies fiebat acrior, & erosit pudendorum labia; ardor inde ortus mitigabatur lacte & aqua tepida, quibus partes affectæ sæpius ablutæ sunt.

Continuatum fuit idem remedium, & sensim cessavit fluor albus, & ægra in hypogastrio nullam amplius molestiam percepit; menses autem in meliorem ordinem redigi non potuerunt.

A p p e n d i x.

Quæ in aliis opusculis de *cicuta* notavi, ea se confirmant semper iteratis experimentis.

Vidi-

Vidimus illam denuo curasse caneros mammæ malignos, exulceratos, foedifimos.

In aliquibus curavit podagram; aliis hoc malum longe mitius reddidit.

Solvit scirrhus; tollit persæpe arthriticos & rheumaticos dolores inveteratos; in oculorum affectionibus prodest, senibus quibusdam visum conservat; sæpius phthisim sanavit, & ulcera serpentia, rodentia.

Illustrissimus van Swieten, ante aliquot annos ulcus finuosum habuit in pede sinistro; symptomata mala supervenient a nobis justum & magnum metum incusserunt.

Nec corticis Peruviani usus, nec alia remedia sat efficacia levarunt malum; augebatur quotidie periculum, unde in summis rerum angustiis adhibita fuit *cicuta*, & mox contigit mutatio in melius, evanuit metus, atque intra decem septimanas *Vir illustrissimus* integre convaluit;

D

&

& jam iterum per plures annos bona fruitur sanitate, & vegeta utitur senectute.

An orbi litterato majus beneficium potuisssem præstare?

Augustissimis nostris, totique Familiæ cæsareo-regiæ conservavi Virum, cui sanitatem suam integerrime confidunt; quem amant, quem venerantur.

Ego mihi conservavi *Patrem*, cui totum, quod sum, debeo.

Utinam *cicuta Eum* redderet immortalem!

Quod autem subinde *cicuta* cito tollat malum alias maxime rebelle; & subinde in altero ægro, eodem malo laborante, lentius agat, & vix quidquam mutet, & dein in aliis plane nil efficiat, videturtribuendum esse diversis ejusdem morbi speciebus, & diversis symptomatibus, quæ superveniunt.

Si specificam morborum genericorum diagnosim perfecte novissemus, facile nobis foret determinare: quo in casu hoc

vel

vel illud remedium certo & cito prodes-
set; & quo in casu vel parum vel nihil
efficeret.

Quam utiles se præstarent practici! si ad
ægrorum lectulos morborum genericorum
species & differentias exacte conarentur
observare, & docere.

Quæ artem solummodo ornant, sunt
minus utilia, & fere superflua; quæ ve-
ro ad cognoscendum & curandum morbum
faciunt, sunt essentialia & maxime neces-
saria; nam in his vera medicina versatur.

De extracto *Napelli* seu *aconiti* flore
cæruleo quoque adnotare debeo, quod
id novis experimentis semper efficacissi-
mum comprobetur.

Solvit potenter; movet transpiratio-
nem, & sudorem; prodest sæpe in ne-
glecta lue venerea, arthritide, rheuma-
tismo, podagra, in amaurosi, cataracta,
cephalæa, paralyfi ubicunque solvens &
penetrans remedium requiritur.

Qui loco *Napelli* seu *aconiti* flore cæruleo exhibent *aconitum* pallens, ii habent remedium minus efficax.

Extractum *Hyosciani* & *stramonii* in Epilepsia, convulsionibus, & spasmodicis, in mania & furore sæpe optimo cum successu adhibetur.

Ufu *colchici autumnalis* multi quoque ex pessimo hydrope, & asthmate curantur.

Debet autem acetum colchicum parari ex bulbo recenti & succulento, si enim is farinosus est, amisit omnem virtutem.

Si acetum colchicum fortius desideretur, tunc sumuntur binæ unciae recentis bulbi *colchici autumnalis* ad libram unam aceti.

Sex nunc habentur nova medicamenta, quibus ego meo labore, periculo, & meis sumptibus artem medicam ditiores reddidi.

Ete-


Etenim demonstravi multis & iteratis experimentis *cicutam* vulgarem seu *conium* *Maculatum* Linnæi, *aconitum* flore cæruleo, seu *Napellum*, *hyosciamum*, *stramonium*, *colchicum autumnale*, *Flammulam* *jovis* seu *clematitidem erectam* Linnæi esse Medicamenta innocua, & saluberrima, quamvis semper pro summis venenis fuerint habita & descripta.


His plures restitui & in vita conservavi, qui certo certius interiissent miserrime.


Omnes autem curare & conservare non videtur esse possibile.

Interim de iis, quæ feci, mihi gratulor, & gaudeo, atque si vires & sanitas permiserint, opera mea in salutem generis humani diligenter continuabo.

F I N I S.








Dictamnus albus Bot. et Offic



Flammula Jovis Offic.
Clematis erecta Lin.



Pulsatilla nigricans. Offic.
Anemone pratensis. Linnæi.

